


樂靜先生李公文集第十一

書五

鉅野李昭玘字成季

上鄆州安撫劉莘老相公書



答劉秀才求先博士墓誌書

代賀方回上李邦直書

代賀方回請見書

代四兄求薦舉書

上鄆州安撫劉莘老相公書

某惶恐頓首百拜上某官閣下某元豐間作舉子同相公  
二令息登進士科後一歲復與今管城令偕除學官是時  
方執子弟之禮請謁左右相公亦以禮進而拒也聽言

侍坐茫然如循大海之涯莫能窺測一二退以自許以謂  
寒鄉晚進望大人先生名德之重一造其門以得見為幸  
元祐初詔試入館相公位既顯德業益著天下之士奔走  
望風摩轂而至皆一時之豪傑相公坐政事堂為天子調  
緝百度導迎太平塞天下之觀望以得失為輕重外則為  
朝廷考觀人才內則相與講論經世之具相公固不輕於  
與人士之吐奇畫策者亦平日感慨自負不疑於有為也  
自惟涉道甚淺聞見鄙野氣孱志狹一無所長乘馬從都  
陪三館之士出入掖門塵埃風雨破帽自障踉蹌俯樓日  
復一日顧左右虎士如有愧色區區亦莫知其何為也同  
列之間俊異朋合吐詞論事伸眉抵掌方使雄句扶輶賈

馬執鞭其後相與並驅周旋每坐其間不敢據席面熱氣  
第竟不能語闐闐如屋上鷓惟恐其彈射之將至也退而  
治事則磨丹和鉛鏤補字畫一見蠹蟲則惡而殺之獨不  
知無功而祿坐官舍食太倉黑頭利喙便腹蠢蠕月費三  
萬錢亦書林之一蠹也當此之時便有投劾而去暇振衣  
彈冠趨步王公之庭哉夫犯分而進不若知守而退使人  
使人可賤不若以賤自安往時雖數月未嘗一走門下者  
其志亦如此而已如某等輩雖百數十必無補於盛德之  
萬一猶能退自屏縮以冒昧為罪亦於相公進賢退不肖  
之道有助焉爾苟為不知此三日一謁五日一拜縱不蒙  
箕踞而慢罵亦門下之罪人也京居累年職事既非所安

又延以貧病求去甚懇累月未報猶以筵撞鐘幸其鏗然以應固不可得也伏蒙相公造物無間與之曲成憐其無用之愚一言挺鎔獲遂所請被命奔迓束裝東歸洒掃敝廬上先人家墓哭凡長於室問勞孤孥飲食族子弟私願既畢徑趨官期度白馬之橫流覽鄴都之頽址浮清漳探滏口弔黎人之墟訪赤狄之祀如歷階升天底於上黨其地襟以三閩帶以汾沁七國之時為韓邊邑趙魏倚以障秦而相為鴈行秦不破韓不敢循東山而下開元以來連洛六州為一大鎮騎太行之脊前扼幽并旁蹙鎮定當四塞之冲屹為完城亦形勢之國也其俗儉嗇固陋克於自守爾我不相易故急衣食而緩節義重財賄而薄婚姻地

高氣寒故堅忍而壽陵阜多川澤少故有餘於力而不足於智雖強眊難令而無推牛發冢羣行剽劫之患斯有取焉爾上自秦漢下及五代坑趙卒封馮亭直盜兵之冤翦鳴辰之禍夾城之圍三垂之戰遺踪舊事歷歷可按一來於此年穀既豐民訟希濶飽食而日有餘力山經水志斷碑遺史田野老人之語究其本末足以增益所未聞登高望遠山川氣象負抱回合感事賦詩足以泄其羈旅之思不知為吏之勞而有宦學之樂此皆前日之賜也幸甚幸甚日夜奮勵未知所報雖然士之為志也致一而已是非可否重輕利害衡之於心而照之以道無待於人人亦何與於我也要之不辱於終身之義自信其所為而不苟擬

然中立不倚於物而姑從吾所好其為窮達用捨則有命焉爾如某之說雖相公之自處者猶若是也以身任國事宰平天下裁量斟酌合千萬人之情同不齊之口愛憎毀譽動盪排觸紛紛籍籍特未定也日使百手百喙撫籍解釋必不能平惟相公應之不撓使物自為輕重去就而不相薄者為能洗濯其心一以待之而已士之與王公雖貴賤異勢苟為學先王之道要其自得之志未嘗遠也汶為東藩非勲德之盛無以壯京師而鎮方回股肱勤勞暫爾分逸西歸之名正在朝夕伏冀為時貴生還踐鼎席宗社永賴天下蒙福某官守拘隔未由參侍台座下情無任傾依激切之至不宣某惶恐頓首再拜上

答劉秀才求先博士墓誌書

博士劉孝嗣也

某再拜伏蒙遣人寄示先博士行狀委之誌銘伏讀反覆泣然墜淚哽塞終日恭惟先博士文章議論器業風節卓然盡在人上士大夫知其名者莫不嘆息追憤願為之載述而猥先不肖理亦疑焉自念與先博士元豐初擢進士第名列奏籍有同聲之舊元符間攝事南都因緣聚首把酒笑語傾露肺腑情義款熟復為同好之友古之人既曰故舊朋友凡有以赴患難託子孫者皆受之無拒不幸且死俾之書數百言納諸壙中以信後世乃餘事爾來使患然必以此也幸甚幸甚某不敏輒逡巡再拜以辭固有說也某杜門屏處十餘年中間禍患摧併哭泣之哀相踵者

七八志慮凋耗餘息僅屬忽忽如迷人未嘗涉書史窺古人制作之意筆硯塵涸覆弃地上不復收拾逮今事往痛定過意少遠欲為小詩陶寫情性經營終日不能成章間得一二句瑣俗淺惡正如劇兒行歌乞人擊節之語竊自鄙笑亦復慚恨竟與敗絮敝屣投之糞壤示不更作行年凡七十百事斥廢每遇天日暄和藉莞擁絮坐墻下暴背摩腹氣血俱融頹一寐此自用也其他種種現前不復經意若夫枯腸索竒字嚼齒造健語蓬頭搔髮其色焦然微俸於世<sup>俗</sup>牙頰之間固不暇也此某所以當辭而左右者不得不聽某之辭也必欲強其所不能使某不得以不能自免則一切荒浪顛倒苟塞來論一聞於人百手指笑足下

方以顯親為孝而無以慰其心某之玷負先德亦不克終故舊朋友之義非所安也昔柳子厚死皇甫持正為文哀之知子厚者止如此而已韓退之為誌其事辨說明偉信非常人所能知者光芒一出千古不滅言足以發之故也足下欲以此意見屬寔非所敢當必求諸能者毋勤來使幸甚某再拜

代賀方回上李邦直書

伏念犬馬之齒既壯且老望門下之日不為不夕方未冠時碌碌無所知識閣下應直言詔蘄然起北州策天下利害於天子之庭卓卓皆經濟大務傳之四方士大夫誦其言想見其人者摩轂而至某自量何如人不敢奉洒掃以

從衆人之後竊以為慚後數年迫於致養遽從一官監門  
管庫義苟不辱坐則如窮木索動則與輿皂等動一忤上  
官訶詆隨至且虞誅責之不可脫則無以事親畜妻子故  
垂頭塞耳氣息奄奄岷然自奮之心日已微矣閣下位益  
顯名德日重一旦參預大政門下之客皆一時豪傑而某  
之貧賤微陋不改如平日縱能操尺紙之謁膝行下風門  
闌具謁之吏一覘其姓名已偃蹇不問左右青紫睥睨耳  
語不怪則笑雖某之心已不能自信也故又逡巡中輟某  
嘗思古之王公女臣出則知名世不幸不同其時不可復  
見時雖同而老死窮僻終身不得而見之者皆命也可以  
往見矣言不足以自媒力不足以自舉欲行而如有挽之

者而又蹙焉疑亦有命爾然以謂或出於人事之不齊者  
猶未志也北江外代歸閣下方出鎮咸陽距京師二千里  
堂上之老不可去湏臾升斗之祿甘旨不足蓋未能羸三  
月之糧褰裳以往也今則調官衡陽將浮汴達淮涉江漢  
絕沅湘萬一有逃於風波之患而長沙之南地苦卑濕皆  
騷人逐客悲吟嘆息不自聊生非北州之士所能安也而  
又母老妻病子弱身復多疾一月之間飽食甘卧者不過  
數日方且日夕促促以鼓鑄馬事金錫之氣薰灼腸胃叫  
呼咄咤驅策吏卒以赴其程此賤者之事非敢辭也自  
惟平生多艱小有所湏動不諧適百步十躓一食三噎又  
安能必後日之志哉所幸守官彭門辱與公子有一日之

雅今輒以悃幅自託繕寫所為惡書若干篇上獻台座俳  
歌諧語之比試以閱之幸甚若夫渭水秋風倚樓長笛固  
未能挹司倉渭南一勺之細又安敢望李杜之波瀾哉區  
區之心伏惟左右憐其憔悴之餘無他好而已

代賀方回請見書

某聞古之士方其奇窮瑣賤未遇之時或束書裹糧周行  
四方跋山涉川冒犯霜露固非去墳墓之國而樂他邦舍  
安佚而好遠游也將欲覽天下之風俗交天下之賢士大  
夫收其聞見議論之益去其卑污固陋之弊以自成其所  
志者不得不然耳與夫抱殘編屏窮巷偃樓廈縮端坐則  
面墻舉頭則礙屋幽憂沉寂志哀而氣促區區掇拾古人

之腐餘與兒女子語欲望遭時而立功名者亦可鄙矣孔  
子曰父母在不遠遊遊必有方此古之士未嘗不遊也昔  
司馬遷二十而南遊江淮上會稽探禹穴窺九疑浮湘沅  
北涉汶泗講業齊魯之都觀射鄒嶧通梁楚以歸若夫高  
山大川名都沃壤物產之蕃美士人之豪秀固已洽聞多  
識而昭徹乎胸中矣然後辯論古今馳騁千載之上下著  
書以名後世此有志者所為也某不肖生質孱懦未能強  
立而竊有志焉感慨先王之餘風想聞士大夫之高義惟  
恐身不及見而見之且不多也聞者南遊梁宋東走鄒魯  
還過於滕滕古侯國也山林深茂氣俗淳重宜有賢者為  
政於此某一至境上而閣下之休問溢於民言喜躍不自



勝以幸其及見輒有請於執事者願一識風采而服其緒論惟閣下愛之而已

代四兄求舉書

某聞萬金之賞陸駕大車川浮巨舶南窮甌越北極胡漠龍皮象齒文犀紫貝夜光之珠照乘之玉一旦得之則深居大第拱手待價通侯巨室先之以將命繼之以飲餼以幸一閱方牀大案藉以藻繡大僕扶扶逡巡而進華匱十重綺囊十襲整襟濯手而後發照爛錯落神動心悸徐問其價則以千言萬以萬言億下酬之則勃然作色中酬之則掩口而笑上酬之則躊躇不欲而後應蓋所得者重則所予者不欲輕故也販婦販夫迷 粟粟水捉螺麈足靴

指秃暴露風雨罄其力不通一鈞之舉計其價僅足一日之食正晝過市欲人問之而未嘗顧也日暮人散雞棲於埽豚歸於豎突未及薪釜未及粟其色焦然揭之則屢用弃之則可惜皇皇扣人之門戶幾何不悲吟行乞矣此其意何也所養者薄而所售者急也蹈道之士被褐懷玉志足以輕王公氣足以驕富貴致恭盡禮則見之誠親心合則交之非其徒格之不來非其義就之不見嘗忍山之不深林之不幽世俗之人將逐其後也又何嘗以半通之綸五斗之粟折腰下邑蹶蹶於人眉睫間哉若夫道不足以任己才不足以驚世其志懦而卑其器拘以迫使之効一卿任一官輕趨疾作以應期會指呼不知勞訶叱不知辱

如轅下駒顧一束芻垂頭塞耳不憚鞭箠當是時又何暇  
議高節卓行矯激自負哉雖悲吟行乞亦所不恤也某生  
質頑昧讀書二十年三試不第晚從廕補得官不鄙碌碌  
獲佐大邑生齒繁浩薄檄填委勾考之詳出納之吞日夜  
礪砥計功補過苟免罪負中心所幸者一薦狀耳薦狀所  
願者一縣令耳今則已踰兩考未能如格遙遙引睇於門  
下者日夕以之終亦不敢以鉗結自廢也恭惟閣下道德  
在躬仁恕成物屬部之吏洗滌出塵泥而脫枯槁者固已  
多矣以某不才何以與此然而竹頭木屑無間於大匠之  
手牛溲馬勃不棄於良醫之門此某之心猶有待也昔者  
莊子舍於故人之家故人命孺子殺鴈而烹之孺子曰其

一能鳴者夫能鳴者則矯翼而飛不能鳴者則合喙而死  
如是則某今日之言不得不聞於左右也伏惟閣下貸其  
借易憐其凡成出一手而挈之糜身之報不敢為眾人後  
伏惟聰明亮察幸甚幸甚

樂靜先生李公文集卷之十一

樂靜先生李公文集第十二

表十三

鉅野李昭玘字成季

賀太皇太后生辰表

賀皇帝即位表

賀太皇太后表

進奉賀皇帝登寶位上絹表

謝告諭表

賀冊皇太后表

賀冊皇太妃表

進貢綾表

賀興龍節表

慰皇帝表

慰太皇太后表

賀玉璽表

賀元符改元表

賀太皇太后生辰表

候屬西成屆<sup>慶</sup>風之正氣時生上聖配天德之鴻休聲文  
所臨舞蹈同底<sup>恭</sup>惟 太皇太后陛下母儀恭肅坤德靜  
柔弼成永圖休有顯烈三光明而四時節九功敘而百度  
熙恢基業於無垠躋民物於交泰文武之興周道華胥之  
贊軒圖迪是芳風夙超治古 臣守職藩佐叨榮聖時觴獻  
萬年莫預造庭之列心肩一節徒傾就日之誠宜益介於

延洪庶克符於頌祝云云

賀皇帝即位表

臣某言伏奉三月五日詔書恭承 皇帝陛下虔奉寶圖  
踐登宸極震雷一發聲赫四方大明繼升光被萬國生靈  
鼓舞動植昭蘊凡在撫臨無不欣戴中謝 臣聞盛德之後  
世有天下有道之國篤生聖人恭惟 陛下席六帝之洪  
休對三靈之丕眷仁孝純乎天至聰明茂於日躋岐嶷之  
間已能動悟先帝號令之始足以慰悅衆心社稷有所憑  
依神祇以之安樂皇天右序復開命武之符率土祇驩行  
見紹堯之化 臣限拘符守阻造闡庭無任抃蹈<sup>躍</sup>之至  
賀太皇太后表

伏承太皇太后誕膺寶冊同攬乾綱號越常尊禮隆無上  
孝慈交感遐邇祇歡中謝恭惟 太皇太后陛下柔順在  
躬聰明齊聖輔佐英帝肅陰教於六宮保鞠先朝端母儀  
於萬國載加盛典允答徽音揆日以升均照臨於南面與  
天同久擁康樂於西朝 臣限守藩符不獲趨詣闕庭無任  
瞻天望聖舞抃激切之至

進奉賀皇帝登寶位上絹表

大人繼明神祇協相四方來賀玉帛交馳仰罄懽心輸畢  
邦物 臣猥叨符守阻觀帝閣敢陳在篚之儀少助充庭之  
實

謝告諭表

伏蒙聖慈特降勅書告諭 臣即時集官吏軍員將校僧道  
百姓等宣讀訖睿智纂圖深恤艱難之託邇遐聽命戴御  
撫育之恩中謝恭惟 皇帝陛下純孝在躬至仁感物奉  
時昭考將圖天下之安咨爾庶邦使知王者之志 臣猥叨  
符守誕布德音坐食見堯盡識宅宗之念謳歌啓共迓極  
治之期 臣無任瞻天望聖感戴激切之至

賀冊皇太后表

伏承皇太后允膺寶冊增奉鴻名大孝隆親事光墳史萬  
邦蒙福喜極人神中謝恭惟 皇太后陛下育粹坤元服  
勤陰教輔佐先帝志在靜柔保鞠聖躬德惟均一式彰懿  
範推講盛儀祇答懿慈盡明王之要道誕敷徽命鼓百姓

之歡心臣限守藩符不獲躬詣闕庭云

書屋校鈔書籍

### 賀冊皇太妃表

伏承皇太妃誕膺徽冊增奉隆名凡在遐邇孰不抃蹈中謝恭惟皇太妃陛下慶傳貴緒瑞發靈源率嬪御以靜柔奉蘋蘩而蠲潔屬真人之續緒推盛典以褒崇懽動宮闈事光史冊臣限拘藩守阻造闕庭無任抃蹈激切之至

### 進貢綾表

禹分九州均節諸侯之貢周建太府校登天下之財入之必以其時制則各從所有方帝仁之愛養滋物產於盛多迨講舊經畢修常獻臣猥叨符守獲奉歲輸敢陳在筐之儀以助充庭之實

### 賀興龍節表

四序周而在朔方成一歲之功二陽進以為臨允叶大君之吉篤生真主奄有庶邦紹六帝之休光懽兩宮之孝養車書所暨舞蹈攸均中謝恭惟皇帝陛下聰明日躋智勇天錫應千齡而出震標大器以乘乾虎嘯龍翔共覩聖人之作風行雷動坐躋萬國之寧眾賢濟濟以在朝至化新新而美俗三靈助順六氣薦和人情胥悅於謳歌天祐偕來於福祿將窮冬律俯屬誕期載瞻虹渚之祥竊效封人之祝恭默思道允懷上帝之心安樂延年永邁南山之壽臣限拘符守阻造闕庭云

### 慰皇帝表

東武劉氏味經

今日神宗皇帝小祥者渭水衣冠想神明之如在石門  
霜露驚日月之難留中謝恭惟 大行皇帝澤被生民道  
躋曠古收成功於六閔垂鴻業於萬年欲窮海上之山遠  
厭人間之世言未忘於在耳歲已換於星終 皇帝陛下  
孝極事亡念深率考盡憂勤而續禹感冥漠以見堯屬練  
服之將更結聖衷而永戀昊天罔極春露既濡雖哀不可  
忘願奄經於時變而禮當有節庶下慰於人情臣限守藩  
符不獲云

慰太皇太后表

日月變遷人神感惻中謝愛深母道慘結聖衷覬少順於  
天時庶下安於人欲

賀玉璽表

大明當宇百辟造朝翼緒紫以前登發金箱而跪進靈光  
煥耀虹氣燭天妙刻蜿蜒龍文照日作乾安之樂奉天子  
之觴誕布宥恩敬謝宗廟慶流海宇騷動神人寔曠古所  
未聞宜四方之來賀中謝竊以明德在御嘉應並臻蓋天  
將有示於人故地亦不愛其實至神變化非意所知和氣  
薰蒸為時而出惟珍符之肇見錫景命以來崇眷懷本自  
於帝心追琢疑非其世造學者之辨無以稽諸史玉人之  
巧莫能喻其工不必論前世之所遺要非遇聖人而不愛  
恭惟 皇帝陛下仁孝率考嚴恭事天朝廷治而庶官修  
陰陽和而五穀熟百神協相四表乂安宜保無疆之休以

稱甚盛之德靈芝朱草非難致之物神鼎丹甌不足効其  
祥非假祕文孰昭休既昔堯享封人之祝漢聞嵩岳之呼  
曾未若躬承受命之符永為變國之器聖作明述方啟佑  
於千齡史書樂歌將有辭於萬世

賀元符改元表

准詩勅自紹聖五年六月朔已後為元符元年神休沓至  
昭示聖時歲號更新欽承天意布宣萬國鼓舞羣情中謝  
恭惟 皇帝陛下 一德感通三靈眷佑諸福之應緣類而  
來明照下土則神光燭天澤潤生民則甘露如雨欲付以  
享邦之慶又申之受命之符皆前世所罕聞不踰時而來  
上載諸簡冊播之聲詩猶未足著無窮之傳復何以表非

常之既 將詔世宜重紀元太史編年無愧祖宗之明美  
堂頌歷永同天地之期



樂靜先生李公文集卷之十二

樂靜先生李公文集第十三

表十一

鉅野李昭玘字成季

賀皇帝即位表

賀生皇太子表

謝永興路提刑到任表

謝京東西路提刑到任表

謝移京東東路提刑到任表

知滄州謝上表

謝落秘閣校理表

謝降授承議郎表

謝復官表

謝出籍表

謝八寶赦轉官表

賀皇帝即位表

臣某言正月十六日准進奏院通到制書 皇帝登寶位者龍德時升紹一王之休運天恩下霈鼓萬國之歡心凡在蓋容一歸撫御中謝竊以可托天下必允屬於真人克享天心寔有懷於明德恭惟 皇帝陛下聰明齊聖歷數在躬孝悌感於人神言行動乎天地奉兩宮而無間就外傳而弗煩道學生知德心日邁宜先王之眷命付大器以受民二聖嗣興蓋隆于世祚一德相授蓋篤於天倫謳歌朝覲之有歸禮樂政刑之具在享七世崇高之業應萬年

熙洽之期繼體元豐均是吾君之子承華紹聖載安百姓之心永孚四海之休咸賴一人之慶 臣限拘官守阻造闡庭 臣無任 云

賀生皇太子表

臣某言伏覩進奏院報今月八日降誕皇子者太史觀天已識前星之應太人占夢果符男子之祥喜溢宮闈慶均海宇中謝竊以誕彌厥月有開后稷之先則百斯男於顯文王之盛由人神之相與荷福祿之無窮恭惟 皇帝陛下孝安祖宗仁遂動植隆爵賞以繼功臣之世發廩庾以惠天民之窮廣大德以好生示神武之不殺萬事咸理允格至平四夷皆來寔獲多助三辰昭鑒六聖具依載錫洪

休篤生元嗣至誠能動無待薦高襟之性流澤有源何煩  
種北宇之竹况乃岱祇見象炳聖呈光共扶萬世之基來  
兆一人之慶岐嶷之性先自得於神靈聰明之姿將弗煩  
於師傅大本有系衆情以熙臣猥服外僚親逢盛事上南  
山之壽阻預班聯誦螽斯之章莫知鼓舞臣無任云云

謝永興路提刑到任表

從事府僚訖無善狀祥刑陝部遽忝誤恩祇命入疆撫躬  
失次中謝伏念臣學非知奧才不逮中晚掇詞科濫登仕  
版猶未弃詩書之習初不更州縣之勞講藝泮宮無以應  
諸生之問校文芸閣莫能窮未見之書朝廷勸勵之甚優  
事業空疎而幾廢低徊末路慚負盛時未嘗赫赫以動人

姑幸循循而寡過勉從吏責出佐藩方甫及再暮而還寢  
遷大尹之佐願浩穰之多責益屯勉以自持寔有愧於史  
能偶遂逃於官謗屬以田廬蕪沒兄弟凋零孤窮不收嫁  
娶未畢事君之義固內外以一心在臣之私有出處之異  
勢屢彈愚懇通覬使州豈謂天能聽而弗違日雖幽而必  
照不加以罪曲盡其情特優假於使華俾分持於邦憲量  
材非稱冒寵若驚况閩中之奧區為天下之劇部廣輪者  
三千里襟帶者十八州氣俗喜爭動成旅冒山林多阻易  
致奪攘必得通明之才以均察治之寄如臣煩闇遇事濶  
雖踈知任大而盡心尤恐力微而敗績此蓋伏遇 皇帝  
陛下性齊舜哲政邁湯仁表德禮以示人宣誠明而格物

將使路遺不顧人有夷齊之心田畔相推家成虞芮之俗  
臣敢不仰思欽恤俯務靜安閑於無事之時衡以至公之  
聽鄉鄰不擾行獄無留誓殫夙夕之勤力圖毛米之効澄  
清之志非敢望於古人忠厚之風期少裨於聖治臣無任

謝京東西路提刑到任表

詳刑陝右已乏事功易部畿東再叨恩旨量材非稱戴寵  
若驚中謝賦性迂踈聞道蹇淺沾濡薄祿游泳聖時學文  
未去其陳言從吏不聞於善狀亦嘗陪書林之豪傑佐天  
府之浩繁必有可觀未始錚錚而驚世竟無他異但能碌  
碌以同塵屢懇便州遽分煩使事滋多而智窮責已重而  
心危勵志竭精知養愚之無補累日易月願罪戾之益深

久玷官職坐糜廩給方申前請復禪就遷既奔命以戴星  
徒搖心而望日惟京都之近壤連海岱之故區蓋生寔繁  
獄訟惟冗豈茲孱緩可使澄清攬轡登車漸非任使通家  
上冢預有光榮此蓋伏遇 皇帝陛下堯性自天舜功成  
物措世於中和之地道民以禮義之風將使四海為家有  
外戶之不閉羣生成遂無一夫之向隅臣濫總刑章恭承  
德意敢不究心審閱先事禁防寬猛以和上下無擾勉立  
涓塵之効仰酬覆載之恩

謝移京東東路提刑到任表

承乏再暮訖無裨報易官東部尚玷恩榮循省以還兢凌  
失措伏念 臣學非稽古才不通人晚登仕版之榮寢通朝

籍之貴兩叨持節三見周星疾病相仍安恤陰陽之惠精神俱耗難言犬馬之勞多慮近近積憂成畏姑幸屏心而遠罪未嘗飾智以近名審閱獄辭唯恐失好生之意芟除偷黨庶幾移瘴惡之風簡屬年穀順成生民咸遂桴鼓之驚幾息桁楊之繫亦稀皆神明之化陶成非奔走之臣能預方將束裝待罪指日言歸豈謂寬恩復更華使長安之日雖遙千里之圍望岱宗之雲猶均一雨之潤文書有報復之速吏卒無將成之勞昔乃吾鄰盡為屬郡今雖別部曾是故僚願如此之便安寔非臣之覬望而况全齊大國瀕海與區水極魚鹽之饒陸多桑柘之美大姓挾貲而犯法細民禦貨以為姦非有強明之才孰分察治之寄自惟

迂暗難稱使令此蓋 皇帝陛下憲天聰明體道變化紹復先王之政圖終寧考之功御一世之英豪納四方於仁壽夫何微品亦偁下僚謂臣無他已嘗試之任使察臣寡過猶將責以事功蓋天地至大而無私日月雖幽而必照敢不勉修官責祇奉憲條察辭于差庶不愆於明御名除惡務本使不害於善柔誓有補於涓塵期少酬於覆載

知滄州謝 上表

禮官失職甘俟嚴誅邊壘析符尚叨優寄以不可貸之罪蒙非所望之恩驚魂既還零涕無已中謝伏念臣迂踈無取翼輒不持惟知任物以直情不善周身而避患每事必問已失仲尼之前知三思乃行終違文子之常誠一昨奉

太母因山之制謹百官趨事之期夙有司存各以類舉逮  
壽官之易奠道虞主以告行竟達空函樂敗乃事既身為  
之官守反自闕於禮文仰誤神靈之依中櫻仁孝之感過  
莫大者誰其歸之固當戮以市朝可復付之民社眷浮陽  
之封壤控北虜之喉襟澤浸際天雖牛馬之弗及風聲屬  
耳寔雞犬之相聞宜得望人以壯方面敦詩說禮鎮以靜  
緩帶輕裘應之間暇况乃大河泛溢之後一方飢窘之餘  
必先謹養以惠和尤在周知其疾苦如臣孱暗非所克堪  
此蓋伏遇 皇帝陛下天地同仁日月齊照澤及行葦每  
思視物以如傷網漏吞舟不忍向隅之獨泣聊褫官而示  
罰猶守土以長人敢不砥節奉公肅心悔過為臣之道於

事無難推愛國之心以民為本誓殫夙夜少補毫分觀海  
知瀾究隔蓬丘之望舉頭見日長存魏闕之心臣無任

謝落秘閣校理表

備校讐之列久玷寵名委按察之權尚叨華使退慚僥倖  
復荷矜存聞命已還省躬知懼中謝伏念臣學術淺鮮器  
識拘疎偶中詞科濫登文館日見 之浩博坐逃俗吏  
之紛囂物或黨來初急若驚之 難苟得每懷非據之  
憂何敢取容屢嘗求解遽俯從於外補猶竊假於前稱不  
自請陳寢成冒昧索驪珠於魚目已失諸真衣羊質以虎  
皮終非其有宜循名實無紊故常曲被寬恩上還虛授此  
蓋 皇帝陛下紹隆先烈總核百工予奪必盡其公各從

分守內外一歸乎正無忝司存竄堯智以知人博舜仁而愛物養之庶恥收以事功臣敢不勉激愚衷益勤吏責天地之造難補報於生成犬馬之軀誓糜捐於驅策臣無任

謝降授承議郎表

臣某言八月二十二日都進奏院遞到告一道特降授承議郎差遣勳賜如故臣尋跪授訖禮官被黜方在退思勅局示懲止從薄責重干文憲疊負釁疵撫已懷慙感恩零涕中謝伏念臣斷斷不敏碌碌何知初無奇勳以動人每以疎愚而取禍詩禮之訓幼則嘗聞刑名之素書所未學偶預都司之進擢適當常憲之變更宰府付以官僚惟命所赴法吏摘其紙尾謂可則書文既失於舊章罪寧逃於

顯戮止從貶秩尚玷承流雖天地無所不容而犬馬何以為報此蓋伏遇 皇帝陛下聰明睿智以獨斷慶賀刑威之必行遵制揚功永懷善繼亂名改作先務謹誅謂使人知通則能盡其忠故用罰以寬而終歸於恕臣敢不省身夙夜砥節事功知無不為庶竭事君之義死而後已益堅報國之心

謝復官表

天地既交遠契施生之序雷雨方作悲霑曠蕩之恩歸復官資洗除罪戾莫知手舞但極涕零中謝伏念臣材非過人學不知道濫登仕版誤置書林必有可觀未始錚錚而驚世終無他異但能碌碌以同塵運躡省闈遽忝宰屬偶

官僚之有請謂國憲之當更初無預於講論漫不思其抵  
謬罪同破律議在謹誅止鎬階秩之微聊殿籍書之未豈  
謂矜前車之既失開局步於自新川澤納汙一歸曠度父  
母愛子皆出至情此蓋 皇帝陛下堯性生知舜聰遠格  
庶事憂勤而協帝小心寅畏以事天常善救人恐匹夫之  
失所為能盡物期一視以同仁曾是孤生亦蒙聖澤併還  
舊物復領真祠官守不出於田廬家食盡資於廩粟葵藿  
之心常在終幸照臨犬馬之力已衰空慚黍養一無裨報  
獨負生成雖已寢於桑榆願未填於溝壑猶能中田擊壤  
日陪野老之歡聲清夜焚香每效封人之善祝

謝出籍表

滌瑕蕩穢共承雨露之霑濡振衣彈冠莫知手足之抃蹈  
追維前日感涕厚恩中謝伏念 臣生也有時仕而無學習  
識非遠議論甚卑每慚事往而知非不悟才疎而多累兩  
千吏議三丐官祠賴白不可以遠河猶叨黍養難敵或堪  
以畏馬未即弃捐間者上帝降康大祇薦瑞脩成寶刻均  
福薰民敢期負譽之餘生亦願竄名於載籍此蓋伏遇  
皇帝陛下愛人無已視物如傷賞罰之公時乃天道予奪  
之節本於人情謂法以示懲既屢更其歲月過而必改誰  
將自弃於君親曲示函蒙一從滌拭而臣計功無取蹈悔  
良多載肖始終莫酬萬一蓋嘗喻父老以戴上之美意教  
子弟以事君之小心長歌天保之六章百拜封人之三祝



雲天在望但知傾日以為心溝壑未填尚真殺身而報國

謝八寶赦轉官表

甫除罪籍遽進文階望遠雲天特預一時之澤先生簪紱  
如非前日之身寵至若驚感深成涕中謝伏念臣材猶社  
木性寔鉅人初非可用於時終有自貽之悔簡屬禮陳八  
寶慶洽萬邦赦其既往之愆開以從新之路雪霜剗物天  
將使之成材鞭朴御家父終無以弃子矜憐舊物安養殘  
年復陪多士之步趨再奉真祠之洒掃已踰望表仍玷序  
遷未聞圖報之一端併荷流恩之三錫此蓋伏遇 皇帝  
陛下大道善貸至仁無親凡百姓皆得其心無一物不遂  
其性聖功丕冒瑞應並臻嘉與庶工共承多福而臣偶緣

幸會濫服寵休蓬蔭蒙瑋既容可錄支離受粟尤愧無功  
敢不誦明訓以刻肌披愚衷而指日億萬分之有補 九  
死以如歸

樂靜先生李公文集卷之十三

樂靜先生李公文集第十四

表六

鉅野李昭玘字成季

代人賀元圭表

代濟州命官學生道僧耆老請

皇帝封泰山乞 車駕經幸本州表

第二表

第三表

代賀平瀘賊表

代知徐州馬大夫謝上表

代人賀元圭表

欽承休旣叶至日之迎長肆設盛儀闔萬邦而來賀列華

紳而星拱翼寶盞以階升上公跪進而前天子再拜以受  
大樂脩九成之奏羣臣奉萬歲之觴麾幡縹緲於祥風雲  
物中蝠乎和氣精神胥悅霈澤橫流以答自天之休於昭  
不世之瑞曠古盛典一時榮觀中賀自昔陶唐聖神獨運  
惟時文命水土未平歸我帝功薦其器寶謂俊德克明者  
本於智黎民於變者生乎神用此以知人而人績成推此  
以則天而天道順故外黑以示智之所出內赤以顯神之  
所存願強名莫得其緒餘惟默識可求諸形制書猶具在  
世獨無傳三代下哀曾莫聞其付予兩漢甚陋終不發於  
沉潛天心未有以感通人意亦難於窺索綿歷歲時之久  
寂寥霄壤之間爛然光明了不刊缺蓋上穹眷佑有待治

時而神物護持乃至今日恭惟 皇帝陛下儲精稽古恭  
已愛民聽言同衢室之詢化俗猶大章之作兢兢以行道  
巍巍乎成功家陶德化而可封人競恥心而不祀亦堯之  
盛與帝而俱屬景命之方興果珍符之來格學士討論而  
不謬工人辨閱以無疑再考祕文益詳嘉應得玉璜於碯  
水何乃不經出寶鼎於汾陰是誠小物固宜告圓丘而饗  
上帝拱南面以朝諸侯迎福祿之大來對天地以同久臣  
親逢熙旦猥預下僚彷彿闈庭徒極雲之想娑娑田里聊  
賡擊壤之歌

代濟州命官學生道僧耆老請

皇帝封泰山乞 車駕經幸本州表

竊以封禪大事古昔有聞數千百載之相逢望時難偶七十  
二君之可記遺跡尚存非至德無以動天惟聖人乃能行  
禮義當有請時帝可為衆議所同不謀而合輒殫愚懇上  
瀆嚴宸中謝恭惟 皇帝陛下亶聖智之才邁帝王之德  
仁被動植孝感神明朝廷正而庶官修庠序興而衆賢出  
禮極商周之盛樂同韶濩之和四時序而五穀順成九澤  
通而百蠻清 困窮有養囹圄屢空為道難明視古無並  
萬邦咸乂豈惟同德之三千百化已成何獨大功之二十  
三靈協相諸福荐臻太史書祥殆無虛日輿人頌聖如出一  
辭冲融六合之間充塞太和之氣元圭載出垂眷甚休  
青帝來臨示人尤著當躬行於昭報無久曠於上儀必展

時巡用虔祀事願茲東土有曰泰山秦言作鎮之尊東乃  
資生之本羣靈之府衆岳之宗近在太邦素為福地升烟  
中頂可近接於皇天檢玉圓臺亦深明於精意不特享一  
人之慶蓋將蒙萬世之休幸詔諸儒敷求故實矧規模之  
具在皆耆老之能言追真皇已講之文請從今日繼神考  
方興之志奚俟來年惟麟野之舊封陶丘之大邑去畿無  
幾與魯為鄰路固少於縈回地尤多於平行萬人無擁六  
馬不勤纔經清涕之郊圻已見東山之雲物伏望 皇帝  
陛下曲從人欲俯屈帝尊翹日馭以啟行揭龍旗而來幸  
肅傳鳴蹕徑取便塗舜禮方修願陪於羣后堯車儻過竊  
有効於封人庶仰矚於清光不虛生乎盛世云

才原亦作二表

投取梗於洪鐘固知難動納細流於滄海尚或能容是誠  
 力所不量恐亦行之甚易躊躇欲却佞俛復前中謝竊以  
 奉牲玉於圓丘以展報天之禮潔凜盛於泰折式昭事地  
 之儀此皆有國之常經未盡聖人之極致非升中不足以  
 對上穹之佑非降祀不足以接厚載之靈自伏羲以來斯  
 焉可考由祥符而後今則其時敢布懇詞再干宸聽恭惟  
 皇帝陛下聖心天縱神化日新造士訓官羣俊在位制  
 禮興樂習俗已成才 俱開倉箱徧益犀利蒙皮而不試  
 遐荒削在以來庭洋洋乎歡樂之聲恢恢然仁壽之域精  
 神之妙既已和同天人糟粕之餘猶將陶鑄堯舜冬祀方

修而清真格韶音纜作而白羽來大功爰業以升聞諸  
 紛綸而畢至草木山川之勝競出珍符日星雲露之精次  
 垂喜應不為創見非止一書此皆前古之罕聞何獨大封  
 之未舉惟岱宗之作鎮在方岳以居先巖巖之望尤高生  
 生之德滋盛神房阿閣即先聖所棲紫蓋黃光盡吉祥之  
 氣舜帝時巡之禮具載遺文真皇夢感之靈竊聞殊貺伏  
 望 皇帝陛下躬行升降丕答頤懷鶴髮相扶每共談於  
 古事鑿與來幸將復望於清塵宜奉三神之歡以錫庶民  
 之福雖貶成抑定謙不自居而附厚增高寧終廢是弗為  
 也尚稽檢玉之期侯不邁哉徒鬱縉紳之願載言大野俯  
 次輔藩參考舊經最為便道五百里之非遠東北望以甚

平乃汶陽接軫之區正羽衛徐行之地幸頒諭旨夙戒候  
人煌煌華蓋之來四郊風動隱隱春雷之轉萬騎雲從臣  
某等夢寐傾心掃除先路進陪朝序敢希闕里之榮望見  
聖時誰復周南之歎

第三表

盥手奉章鞠躬俟命望雲雖劇伏地無從獻一得之愚已  
幾嗒嗒下十行之詔尚復遲遲中謝竊以因崇祀以告成  
禮當有報為生民而祈福意本無私乃上聖所優為亦下  
情之公願凡在照臨之屬莫知鼓舞而來稽於衆則可從  
真蒙兼聽至於三而必瀆敢避多言筮日之良滙誠斯迫  
恭惟 皇帝陛下化行俗美治定功成陰陽天地以流通

禮樂刑政之明備丁寧德意孰非堯舜之用心熙廣聖功  
不忘文武之勤教交萬物以道得百姓之歡衆賢並興五  
兵俱偃養材有本造小子以詩書懷遠無方裂殊鄰為郡  
縣九年粟腐比戶錢流博獨孤窮飽餘糧而鼓腹析楊纏  
索挂空行以凝塵朝廷胥樂於清明田里茂聞於愁嘆馨  
香有感惠澤無垠共陶一氣之和編為諸福之應元圭發  
見上帝降觀九霄光明日有戴氣千里澄澈河無橫流甘  
露藏絃寶山翠嶺竹實具九苞之食野蠶增卒歲之衣雙  
蓮駢茁不並生於蔗草赤烏白鵲獨先至於四靈淮人瞻  
宰堵之光嵩阜示高真之相嘉谷動盈乎拱把瑞文繼出  
於山林九臯之鶴蔽天同傾萬目五色之芝連篚幾困十

夫禮部受圖歲嘗百數外朝稱慶日或貳參呈露紛綸變  
化奇詭事出乎見聞之表意存乎象數之間譽流聲詩光  
動簡冊此太平之極致何危危乎彼載籍之所傳特小小  
耳惟天之垂眷者甚厚故民之報上者益勤圓丘方澤之  
齋嚴未為之稱束帛金錢之獻遣詔已其來必先喬岳之  
封允答三靈之眷庶弗違於上下亦曲盡於情文庸示光  
揚非為進越博士濡毫於冊府夙脩討論封人側耳於路  
隅屢從汎埽載籍前古無越此時雖退託以未遑願久留  
之何待蓋曠世罕逢於盛際况舊章非設於空文今復仰  
冒嚴誅堅陳丹懇幸稍迴於淵慮難終抑以輿情魯邑儒  
冠已顛顛而北嚮岱宗靈物每靡靡以西來伏望 皇帝

陛下追祖武以聿脩奉天時而順動自大野達東山之境  
導屬車無五日之行良出便安最為平易填金祕冊罄一  
人昭事之心刻石層崖勅萬世無前之烈訪仙閣之縹緲  
觀海日之騰陵百神之御沓來萬歲之聲相屬回鑿夷路  
瘞帛崇壇麾仗雲屯琛貢山積先端冕以愛四方之賀大  
作樂以舉諸臣之觴躬問高年異修羣祀尊儒闕里款帝  
真庭賜醕飲以交歡欣濡德音以蕩瑕穢榮光均被慶賚  
並行永孚宗社之宏休丕顯帝王之能事臣某等敷言累  
牘引領踰時恍迷丹闈之宮堯想見翠華之髣髴躊躇終  
日搖役寸心奏帝典之一篇慙無宿學望人而三祝竊効  
前驅

代賀平瀘賊表

勇枝鷹揚赫天聲而莫禦窮陬電掃穢鼠類以無餘三捷告旋萬方交慶中謝臣聞漢關牂牁之地始定南夷蜀興瀘水之軍寢通諸夏雖屢更酋族時擾疆陲固不煩浮以六師止可以驅之尺蠶夫何在醜敢豎皇靈謂中國之兵不習山林之險聖王之法必寬夷獠之誅輒肆披猖自媒剪覆以至虎臣受略軫使移輸先櫻必死之喉襟大索已窮之淵藪踈頭顱於川谷卷廬落於灰埃何能逃螻蟻之生無復恃螳螂之臂風馳旁檄魄落諸壘伏惟陛下聖德靜淵武烈神速萬全之勢灼見於目中千里之師焱來於天上以山壓卵如水燎枯子無遺亮少快宿憤昔方叔

之征獫狁柔服荆蠻荆貳師之伐大宛震驚西域跋觀遐俗畢附中邦臣素荷國恩忝分符守喜聞寬詔竊助歡聲飲至行封莫陪於周廟頌功稱壽徒望於堯天

代知徐州馬大夫謝上表

祇擇時日初見吏民當朝廷訪落之時各修其職濫師帥長人之寄徒愧於名撫已知榮感恩欲涕臣某中謝伏念臣斗筭淺器畎畝孤生遭遇聖明因緣仕宦亦嘗登進言責披瀝肺肝分貳計司運量金谷載更使指出領憲綱未歷歲時遽啣哀恤養既違於將母義當許於致身逮賜對於天光復轉輸於嶺表出入谿壘之徼馳驅瘴霧之中以革農屍分捐邊野舉頭見日莫望長安方撫水之繹騷病



師糧之難給粗完經費遂致招徠幸蜂蠶之無虞願形骸  
之可乞猥蒙寬詔退守真祠屬瘴疹之稍平奉詔恩而入  
對荷先帝神明之照知孤臣忠梗之心假以便藩養其暮  
齒惟徐方之奧壤 服之舊封井邑浩繁風俗剛悍宜  
資名德以賴藩宣夫何妄庸輒膺任使此蓋 皇帝陛下  
道膺堯智德邁湯仁謂犬馬有一日之勞簪履乃昔時之  
御曲加完愛詎思棄遺 臣敢不勉激吏能奉行德意桑榆  
雖晚未忘幼學而壯行金石不移敢有先難而後易少立  
涓埃之効上酬覆載之恩

樂靜先生李公文集卷之十四

樂靜先生李公文集第十五

啓狀十

鉅野李昭玘字成季

賀河中府經略游龍圖

與隰州孫學士

上開封府蔣待制

賀新潭州張學士

賀新鄧州韓待制

上事謝監司

與交代先狀

謝趙判監

移京東東路提刑謝豐待郎

滄州到任謝韓丞相

賀河中府經略游龍圖

比者伏審肅拜恩綸榮遷帥閫經畫歸乎素業注倚出於  
 上知成命甫行縉紳相慶恭惟某官學通聖奧識照事微  
 抱忠義以有為善功名之自致暫將使指頓實兵儲坐馳  
 智算於屋中生致羌首於闕下功高百戰聲屈四夷初進  
 躡於書林放入登於卿寺游心魏闕暫動三節之趨厭直  
 承明遽起一麾之請惟秦亭之興壤為邊邑之具瞻特賴  
 名臣作鎮方面廉頗尚壯必寬西顧之憂靈武可平幸報  
 東門之役行膺詔握入贊帝猷某方幸依仁繼聞易地尚  
 期展晤少罄叙陳

與魏州孫學士

比者濫被宸恩誤叨憲領量才非稱負寵若驚幸<sup>緣</sup>之  
 榮遂獲見賢之願恭惟某官天姿俊拔國器宏深早擬巍  
 科浸揚撫仕行義足以範模多士文章足以粉飾太平步  
 履瀛洲俊聲莫競翱翔蘭省賢望益高方虞待於親闈屢  
 懇求於藩服大邦作屏暫資善政之才四輔維人允屬元  
 功之後徑趨名節入覲凝旒某晚接英游並登策府奉一  
 介之使將觀大國之風御盃酒之歡良幸故人之遇方圖  
 奏記先屈飛緘感服之私誦陳莫究

上開封府蔣待制

言念少學屬文嘗起執鞭之慕晚從試吏濫陪入幕之游

稍親間燕之談良若喧鷺之役遽緣補外遂失依仁鶴鶴  
一枝暫託蹤於美蔭鴻鵠千里徒絕睇於青雲仰惟刺決  
之餘休有吉祥之助恭以某官識周萬理學造大原以王  
佐而自期非聖言而不道躡科而特起越後躡以先馳彈  
擊百僚皂雕橫漢澄清屬部皎鏡懸秋履服使華增嚴帥  
帥領泉流六路半居天下之利源騰落諸羌獨出幄中之  
勝算重以儒林舊德延閣清班未親日月之光屢從軍旅  
之政暫輟藩方之節制用釐天府之浩繁初落筆以無留  
不閱旬而稱治大點結舌情窮片言羣偷屏心首戴一尹  
方以虛於近弼已密東於上知意在東朝願未伸其素業  
天將大任宜永庇於斯民某竦服誨言悵拘官守地遙望

履心劇戀軒浩蕩江湖何待飛鳧之集低回鷺雀終懷賀  
厦之歸敢乞勉為邦家精調寢饋下情無任傾頌激切之  
至

賀新潭州張學士

竦聞譽命光奉恩綸解印陝郊作藩楚服伏憂慶慰恭惟  
某官學通今古識際天人遇事敢為直躬無愧風生芸閣  
皆名理之談鶚立霜臺有忠義之色耻遂容身之計勇為  
去國之行列郡澄清蕭然虛囹九年饒富浩若流泉俯臨  
大國之封遽報暮年之政益隆宸眷更守名邦淳益清湘  
聊適江湖之興懷鉛紫禁行追翰墨之游某稂以塵蹤竊  
攀英躅石渠舊事嘆從宦之飄流銅虎優恩期望風以徬

佛方謀命駕先辱飛騰許申伏謁之勤少慰叙陳之願

賀新郢州韓待制

伏審解延州之屬郡領楚甸之名邦地介江湖之交物多  
魚稻之美國小而易足民淳而不偷蓋將優養其賢然後  
遠觀其德業見匠石之斲固深識於道微聽陽春之歌亦  
自諧於心賞恭惟某官以學脩性藏器在身以更獻納之  
勞暫資屏翰之寄存心虛靜與物俱來易地之恩漸磐茲  
始賜環之名指日可期某限守官常阻趨賓席仰祈保蕤  
別對寵靈下情無任傾依之至

上事謝監司

服鄉校之官已非其任據先生之席尤濫於名蓋師不可

以少知器必先於自治苟為無本何所取材竊祿太優反  
躬知懼伏念某性資煩闇學識迂疎素乏兼人之能誤當  
聞道之責聖賢可仰何容握管以窺天豪秀滿前良愧奔  
蜂之化蠟而况俯仰一空沉酣六經無簿書紛迫之勞有  
朋友講習之樂退惟僥冒空自激昂敢不考上下責寔之  
時循終始脩己之微講道勸義庶無曠於厥官論世讀書  
將必行其所志

與交代先狀

右某言念傳洛中之價久已服膺傾塵尾之談未遑引袂  
比緣補吏偶被偶思輒當鄉校之官將承賢者之緒幸隨  
願喜獲與愧并恭惟某官國器粹溫天材超拔應休期而

筮仕拔上等以飛榮論議高深下軻雄而不道文章古雅  
揖游夏以相馳方君子之育才俾諸儒之駕說橫經師席  
流化藩州洋乎盈耳之絃滿矣及門之屨英豪輩出道德  
風移隱几絳帷已格泮宮之化懷鉛紫禁行追金馬之遊  
某猥以淹聞獲依成範奔蜂之化祝藿蠹以何能黃狗之  
皮補狐裘而終累行須體踐尚免曠尤瞻晤有期歡躍無  
已

謝趙判監

伏蒙判監朝請以某近舉再任特既長踐者賢不肖天下  
所共知進與退君子之高致所難掩者甚公之論毋苟失  
者可仕之時自古當然於予何有猥蒙歸惠俱益懷慙恭

惟某官立心有常好道不倦淡泊榮味怡安仕途嘗兀兀  
以窮年恥沾沾而自喜放虛舟於不繫斂倦翼以知還迨  
至絕交中散不堪於世累未能力疾士安無損於天和寢  
食俱忘乎典籍之間筆硯幾滿乎門墻之下以傳為癖將  
老未休為立解嘲雖窮奚病妙得鍾王之骨直登李杜之  
壇錦囊不空斐几增重室中之乏王老之氣味席上盡陳五  
之子孫但存青氈獨無愧耳能著幾履其好如何驚然與  
世以無營雅以絕塵而自許每容比德輒慕薦賢寧取不  
度德之譏庶逃蒙顯戮之罪敢來國士之報姑致衆人之  
言自以短綆無汲引之功一快勞吹噓之助巫者祝人以  
千歲固盡誠心楚人售璧以萬金更求真賞

移京東東路提刑謝豐侍郎

比者叨蒙中旨就易東畿猥緣聯事之榮竊有趨風之幸  
恭惟某官儒林重器禁掖名臣文章追三代之醇議論極  
六經之奧是非之智則確乎不拔進退之義則綽然有餘  
大德不爭知江海之善下晚節益厲見松柏之後凋暫輟  
從班出司留籥興王重地式賴於老成論道宗工必咨於  
遠業某素蒙知遇方獲庇依



滄州到任謝韓丞相

城高池深壯矣萬夫之守地大物廣富哉千里之封惟偉  
人可以折衝非惠術不能燬俗先朝脩禦雅資武略之長  
累世承平優假使華之舊如某者斗筲小器章句腐儒自

知斷斷以無他不善沾沾而自喜涉世每謀於揭厲謀身  
素拙於從違安以乘流自信河中之木疲於抱甕豈知井  
上之機才屢試而無聞志已衰而不警猥叨進拔稍獵等  
夷澤虞從大夫之招已乖去就小人乘君子之器自取顛  
危濶疎初出於智昏謬誤殆由於魄奪何獨有言之悔幾  
成不敬之誅屬大事之告終法雖可貸論有司之失職罪  
復何辭方且刻骨退思屏蹤待竄魯趙為禮莫知薄酒者  
為誰戚谷亡羊何但讀書之無罪遽從寬典猶領名藩借  
朽木以可凋收敝帷於已弃此蓋伏遇某官股肱王體柱  
石廟堂裴度之才上所自用武公之後人無不宜大器以  
天下為公至誠得仁者之樂無一夫之失所雖小善以不

遺曲全孤生尤被厚賜雖江海之量無待細流之歸而燕雀之軀寧忘大厦之託誓殫夙夜少補毫分悔不可追願何功於犬馬老當益壯庶有得於桑榆

樂靜先生李公文集卷之十五



書屋校鈔書齋





